



Inatsisartuni ilaasortaq
Sofia Geisler, Inuit Ataqaigiit
/Maani

Ilisimatuut umiarsuaat Kalaallit Nunaata kujataaniittoq pillugu § 37 naapertorlugu apeqquteqaammut nr. 141-2020-mut akissut

Asasara Sofia Geisler

Ilisimatuut umiarsuaat Kalaallit Nunaata kujataaniittoq pillugu Inatsisartut
suleriaasianni § 37 naapertorlugu Naalakkersuisunut apeqquteqaateqarputit.
Apeqqutitit uannit akisassanngorlugit innersuunneqarput.

1. Tusagassiutini sammeneqarnerani umiarsuaq Heiratos ilisimatuut umiarsuaattut oqaatigineqarpoq.

a. Suna ilisimatusaatigissallugu Nunatsinnukarsimava?

Hetairos ilisimatuut umiarsuarinnigilaat, kisiannili yacht-iuvoq nammineerluni
pigisaq, taassumalu nammineerluni angalanermut kiisalu ilisimatusarnermut
atorneqarnissaa pilersaarutigineqarpoq. Ilisimatusartut angalanerminnut
atatillugu sikup pissusianut silallu pissusiata allannguutaanut atatillugu
suliaqarnissaat kissaatigineqarpoq.

Inummik angallammiittumik Covid-19-mik tunillatsittoqarsimasoq
paasineqarmat, angallat mattutissasoq nappaatinut tuniluuttunut
ataatsimiititaliarsuarmit naalakkerneqarpoq, taamaalillunilu umiarsuup
ilisimatusarnissap pilersaarutaasup ilaa pisinnaajunnaarpoq, piffissami
mattusimaffiusumi nunamut ikaartoqaqqusaajunnaarmat.

2. Ilisimatusartussaalluni Nunatsinnukarsimaguni Nunatsinni sumi ilisimatusarnermik ingerlatsissalluni akuerineqarpa?

Hetairos Kalaallit Nunaata imartaani angalanissamut Corona pillugu
Allattoqarfimmiit akuersissummik pissarsisimavoq.

Hetairos Kalaallit Nunaanni Tunup Avannaarsuani nunami allanngutsaaliukkami
angalanissamut Ilisimatusarnermut Avatangiisinullu Naalakkersuisoqarfimmit
pissarsisimavoq. Qinnuteqaat naapertorlugu nunami allanngutsaaliukkami
angalanermut atatillugu ilisimatusarnermik ingerlatsisoqartussaannigilaq.

Allakap ullua: 31-08-2020
Suliap normua: 2020 - 14278
Allagaatip ilisarnaataa: 14654162

Postboks 1614
3900 Nuuk
Oqarasuaat: (+299) 34 50 00
Fax: (+299) 34 54 10
E-mail: pan@nаноq.gl
www.naalakkersuisut.gl

3. Umiarsuit Nunatsinnukarlutik tikinnginnerminni ilisimatusarnermik ingerlatsinissaminnut akuersissummik peqqaartussaappat?

Ilisimatusarnissamut akuersissutit pillugit paasissutissat Naalakkersuisut nittartagaanni takuneqarsinnaapput, uani: www.naaalakkersuisut.gl.

Ilisimatusarnerit ilaat immikkut ittumik akuersissuteqarfiusussaapput - soorlu uumasut ilaannik, kingornuttakkatigut isumalluutininik aatsitassanillu ilisimatusarnerit, Aatsitassaqaarnermut Inatsimmi maleruagassiorneqartut. Aamma Kalaallit Nunaanni sumiiffiit eqqissisimatitat ilaannut imaatigut angalanissaq akuersissuteqartoqarnissaanik piumasaqaateqarfiuvoq. Nunani allani ilisimatusarfinnit naalagaaffinnit pigineqartunit, imaluunniit nunani tamalaani suliniaqatigiiffiit piginnaanillit sinniisaat, Imartanut Inatsisit pillugit isumaqatigiissut naapertorlugu Kalaallit Nunaata imartaani ilisimatusarnissamut akuersissummik tunineqartussaapput. Angallat Hetairos nunani allani ilisimatusarfiit naalagaaffinnit pigineqartut, imaluunniit nunani tamalaani suliniaqatigiiffiit piginnaanillit sinniiseqarnerinut maleruagassanut matuma siuliani taaneqartunut ilaasutut isigineqanngilaq.

4. Nunatsinni ilisimatusarniartut COVID-19 pissutigalugu immikkut ittumik akuerineqqaartussaappat?

Avataaniit Kalaallit Nunaanni ilisimatusarniartut allat tamaasa assigalugit Kalaallit Nunaannut tikinnermut maleruagassanik atuuttunik malinnittussaapput.

Inussiarnersumik inuulluaqqusillunga



Jess Svane



20. august 2020

Inatsisartut Suleriaasianni § 37 imm. 1 naapertorlugu Naalakkersuisunut apeqput imaattoq matumuuna saqqummiuppara.

Naalakkersuisunut apeqput:

- 1. Tusagassiutini sammineqarnerani umiarsuaq Heiratiois ilisimatuut umiarsuaattut oqaatigineqarpoq.
a. Suna ilisimatusaatigissallugu Nunatsinnukarsimava?**
- 2. Ilisimatusartussaalluni Nunatsinnukarsimaguni Nunatsinni sumi ilisimatusarnermik ingerlatsissalluni akuerineqarpa?**
- 3. Umiarsuit Nunatsinnukarlutik tikiinginnerminni ilisimatusarnermik ingerlatsinissaminnut akuersissummik peqqaartussaappat?**
- 4. Nunatsinni ilisimatusarniartut COVID-19 pissutigalugu immikkut ittumik akuerineqqaartussaappat?**

(Inatsisartuni ilaasortaq Sofia Geisler, Inuit Ataqatigiit)

Tungavilersuut:

Aasap ingerlanerani Nanortalimmut umiarsuaq tikittoq ilaasoqarsimavoq COVID-19-mik tunillatsisimasumik, tassungalu atatillugu Nunatsinni oqartussatut ilisimatitsinerminni oqaatigaat umiarsuaq pineqartoq ilisimatusartut umiarsuarigaat.

Oqaatigineqanngilaq umiarsuup suna ilisimatusaatigissallugu Nunatsinnukarsimanera, aammalu ilisimatusarneq taanna sumi ingerlanniarneqarnerisq. Naalakkersuisunut apeqputini tamanna tunuliaqutaavoq.

Kissaatigivara apeqputikka ullut suliffiusut qulit qaangiutinnginneranni akineqarnissaat.